

berriak

ziri

ZUBIN MEHTA

Orkestra zuzendaria



«Ez dakit zergatik egiten dituzten diskoak diskoetxeek, publizitaterik gabe inork ez baitaki atera direnik. Etsigarria da»

EL PAIS

SHIRLEY MACLAINE

Aktorea



«Gidoigileek ez dakite emakumeak erretratatzeko, eta pertsona eszentrikoa banintz bezala erakusten naute»

LA VANGUARDIA

LIERNI FRESNEDO

Ur antzerki taldeko kidea



«Antzerkian krisia ona da. Antzerkiaren munduan norberak galdera asko egin behar dizkio buruari, ezin zara estankatu, eta krisi horrek nolabait galdera horiek egitera bideratzen zaitu»

EGIN

AMAIA ZUBIRIA

Kantaria



«Euskarazko kantariak mesprezatuak, ignoratuak gaude»

EL DIARIO VASCO

iritzia

zuzendaria

OHARRA: Iritzi ezberdinek tokia izan dezaten, ez da komeni makinaz idatzitako 15 lerro baino luzeago idaztea gutun hauetan. Idatzi duenaren izena, telefonoa, helbidea eta NANen zenbakia agertu beharko dira. Laburtu behar izanez gero, zuzendaritzak bere esku du horretarako eskubidea. Erdaraz iristen diren gutunak ez dira argitaratuko. Gutunak faxez, posta arruntez edo posta elektronikoz bidal daitezke (helbide elektronikoa: egunka 01@ mx.sarenet.es).

Pako Suduperi,
KM Kulturuneaz

Gogor aritzen da Pako Sudupe KMren aurka, ezaxolakeriaz eta ahazturaz jokatzeko delat salatu. Hainbat aldizkariren ale batzuen falta dela eta egiten dituzten kritika hauek.

Ez dut esango batere arrazoirik ez duela, baina hori bakarrik esanik, egia erdia baino ez da adierazten.

KM Kulturunean ordu luzeak emana naiz, zabaltu zenetik gora eta behera ibilita nago eta hango bazter gehienak miatu ditut: Julio Urkixo fondoak (sekula ez zaio behar adina eskertuko Urkixo jaunari bere liburutegi osotu eta aberatsa gu guztion esku utzi izana, eta ez jarraitzea gaur egun —beste askorenak bezala— esku pribatuetan usteltzen), fondo gordeak, hemerroteka, bertako apalategietan eskuragarri dauden liburak...

Eta zerbitzua oso ona izateaz gain, neronek behintzat eskaturiko ale guztiak ekarri dizkide, aldizkari nahiz liburu (une honetan ez dut gogoratzen kale bakarria egin didatenik). Eta ez naiz ari bizpahiru aldizkariren gainean Bulletin du Musée Basque, Gure Herria, Ekaina, Euzko Yakintza, Euskalerriaren Alde, Euskera, Eusko Folklore, RIEV, Bulletin Philologique et Historique, Yakintza, Euzko Deya, Egan, Fontes Linguae Vasconum, Annales du Midi, Revue de Linguistique et de Filologie Comparée eta abar, batzuk zaharragoak, besteak berriagoak.

Nere ustez, oso leku gutxitan aurkituko dugu euskal gaietan horren horniturik dagoen liburutegirik, inon bada.

Litekeena da zenbaitetan ale solteak faltan izatea, baina kasu anekdotikotzat joko nuke gabezia hori. Beraz, hobe da azterketa bere osotasunean egitea eta ez bisitaldi zehatz eta bakar baten ondoren.

Eztabaida, neure ustez, beste bat da: itxuraz ondo gestionaturik dagoen liburutegi

bat, zerbitzu ona ematen duena, bertako materiala erabat eskuragarri duena eta bazkide aldetik ere arrakasta lortu duena —nik beharrezkoa eta guztiz berezia gehituko nuke—, nola hobetu liteke? Nola osa liteke bertan falta den materiala? Suposatzen dut izango dela aholkularitza batzorderik, eta ez badago guztiz beharrezkotzat jotzen dut. Baina zein erizpideren arabera osatu: egiten diren eskaerak, liburutegiak berak dituen helburuak, espezializazioa... Jon Sudupek ederki daki aipatzen dituen aldizkari horiek ezin direla kalean erosi, beraz, beste liburutegiei (Pariskoa, Bordelekoa Euskal Erakustokia, Pauekoa, komentuetakoak...) eskatu beharko litzaieke kopiarik edo mikrofitxarik, batez ere euskararen inguruan —aldizkarigintza, hizkuntzalaritza, kritika, literatur sorkuntza— dauden gabeziak aztertzeko.

Nahikoa lan egiten ari dira KMn bertako katalogoa mikrofitxetan ematen eta aldian behin liburutegiko altzorrak berrargitaratzen; beraz, denbora eman behar zaie ahalik eta hobekuntza gehienak egin ditzaten...

• **Ritxi Lizartza**
HERNANI (GIPUZKOA)

Anoetan bandera
espainiarra

«Euskal Herrian badira euskaradunak izan arren abertzaleak diren hainbat lagun. Ez al zenekiten?»

Esaldi horrekin bukatzen zuen Juan Luis Fernandez Gutierrezek EUSKALDUNON EGUNKARIAN urtarilaren 31n argitaraturiko bere gutuna.

Eta behin eta berriro irakurriagatik ere, hainbat baten falta somatzen dut komatxo artean jarritako dudaren esaldi horretan, euskal hitzaren hainbat zuzen, zeren, espainiar sentitzen dena, ez da bada espainiar abertzale?, edota frantziar sentitzen dena frantziar abertzale? Halaxe abertzale euskal abertzaleak gara soilik?


Beraz, hasierako esaldia berriro hartuta ateratzen dudana ondorioa da Juan Luis Fernandez Gutierrez jaunak idatzi nahi izan zuen esaldia hau zela: «Euskal Herrian badira euskaradunak izan arren euskal abertzaleak ez diren hainbat lagun. Ez al zenekiten?».

Eta, kasu honetan, erantzuna da: Bai, baina genekien.

Besterik gabe.

• **Jeronimo Iztueta Etxeberria**
DONOSTIA

PAREJA / DIARIO DE NOTICIAS



— Futbola horrelakoa da.

seiko urrea

Pako Garmendia



Bake borroka

Bakerik ezin lortuko dugu, beraz, borrokarik egin gabe. Gaur egun nagusi diren indarren arteko harremanak, bere orain arteko bidetik jarraitzekotan, ez du bakerik ekarriko. Ondorio horretara iristen ari da gero eta herrikide gehiago. Hargatik bakearen aldeko deiak, hau edo hori egiteko eskatuz, mobilizatzea bultzatuz.

Mobilizapenak gerrarako egin izan dira. Borroka ere gerrari lotu izan zaio. Baina,

orainaldian, mugitu beharra dagoela esaten da, mobilizazioa eskatzen da, hain zuzen, gerrarekin amaitu eta bakea lortzeko. Bide horren arian legoke bakearen aldeko borroka eskatzea.

Baina badira borrokek gerra ekarri izan dutenak. Eta badira borrokek bakea erdiesteko izan direnak. Sarritan, gainera, gerraren osteko bakeak ez diete inolako bakerik ekarri izan galtzaileei. Izan dira, orobat, irabazi zutela uste eta hurrengo egunetik bertatik bake negargarria bizi izan dutenak.

Aspaldikoa da, nonbait, bakea eta gerra elkarri lotzeko joera hau. Si vis pacem, para bellum (bakerik nahi baduk, gertutu gerrarako). Parabellumak eta tanketak darabiltzenen, denek esango dizute, bakearen ekartzeko edo mantentzeko daudela gerran edo gerrarako gertu. Gure euskal gizartean eraginik haundiena duten gerrari-gudari talde ezberdinek, denek nahi luteke ahalik eta herritarrik gehienak beren borroka-lagun bihurtu, normala den bezala, beren

buruak herriaren zaintzailetzat hartuak izatea nahi dutelako. Baina, herritarrik gehien-gehienek ere, gerrari-gudari denak herria zaintzeko baino ezezik, herri borondatearen meneko nahi lituzteke. Gure herriko gehiengoaren borondatea beren alde ez duten indar armatuek, baina, zera diote: ezin dutela ontzat hartu gehiengoaren borondatea, egon badagoelako beste indar bat herriaren nahia errespetatzen ez duena.

Eta horretan gaude gu eta horretan dago bake-borroka erabakia. Auzi larria eta neke. Heriomin askoren iturburu.

Ni ere bakearen aldeko borroka beharra ikusten duten horietakoa nauzu. Baina ez nuke neure burua iruzurtu nahi: borroka zer-nolakoak erabakitzen baitu bakearen zer-nolakoak. Nolako borroka, halako bakea. Ez dago besterik.

Herriari bizkarra emanda egiten den borroka herriari bizkarra emango dion bakea ekarriko du. Herriaren borondatea ontzat hartu eta errespetatzen ez dutenen artean hartutako erabaki eta hitzarmenak herriak gabeko bakea ekarriko digute.